



1

# BOYCOTT SOCIAL

*Pratique Anti  
Islamique De Bannes  
Ennemis Du Prophète  
Mohammad<sup>saw</sup>*

*De*

*Imam Zafrullah Domun  
Jamaat Ahmadiyya Al Mouslemeen*

*Ile Maurice*



Mo commencer par le Nom d'Allah, Le Gracieux, Le Miséricordieux. Li Le seul Etre a qui nous soumette nous. A part Li pena personne Ki nous adorer ni de ki nous cherche de l'aide. Nous soumission à Li finne libère-nous de soumission à tout autre ki Li. Nous demande Li pou envoie So Bénédiction lor le Saint Prophète Mohammad<sup>saw</sup> et so bannes compagnons et bannes membres de so famille et tout so bannes suivants sincères ki finne suivre so bannes enseignements dans le passée, azordi et dans l'avenir. Nous aussi implore Allah pour envoie So Bénédiction lor Hazrat Mirza Ghulam Ahmad<sup>as</sup>, le Messie Promis et le Mahdi. Nous demande Allah ki Li aide nous pou continuer travaille pou faire dimoune comprend le vrai visage de l'Islam ainsi ki So Messie et Mahdi finne enseigne nous et retire tout bannes fausses enseignements ki azordi jour bannes dirigeants du Jamaat Ahmadiyya pé essaye rode faire passe pou l'enseignement du Messie. Ça Jihad là dimanne ene grand détermination parski l'emprise de l'administration du Jamaat lor l'esprit bannes dimoune simples et aussi bannes intellectuels li énorme. Et bannes dirigeants mal guidées avec le calife en tête zotte pé faire tout pour maintenir l'esclavage mental de bannes Ahmadis pou zotte capave continuer à présente ene mauvais visage de l'Islam et l'Ahmadiyyat dans le monde malgré zotte bannes déclarations ki zotte pé faire le contraire !

## **OBJECTIFS DE CA LIVRET LA**

Dans ça livret là mo pou expliquer couma bannes idolâtres de la Mecque ti essaye élimine le Saint Prophète Mohammad<sup>saw</sup> et so bannes compagnons quand zotte finne pratique ene boycott sociale sévère contre bannes là. Et ensuite mo pou expliquer couma ene boycott sociale finne pratiquer dans l'île Maurice contre bannes membres de Jamaat Ahmadiyya Al Mouslemeen par bannes Ahmadis mauriciens en obéissance à zotte calife Mirza Masroor Ahmad. Ca bannes Ahmadis là zotte content faire bannes grand déclaration ki zotte content tout bannes dimoune et zotte pena la

haine pour personne. Mais en réalité par zotte façons de faire zotte finne montrer ki zotte ene de bannes sectes des plus arriérés de l'islam parski zotte finne préfère abandonne les enseignements d'Allah, du Saint Prophète<sup>saw</sup> et de Hazrat Masih Maood<sup>as</sup> et suivre zotte bannes penchants naturels malpropres et méchants. Et en fin mo pou faire certains commentaires en général.

## **UN PEU D'HISTOIRE**

Nous tous nous bien au courant ki kalités persécutions bannes premiers musulmans finne subir de la part de bannes idolâtres de la Mecque pendant les treize premiers l'année de la mission du prophète Mohammad<sup>saw</sup>. Hazrat Bilal fine trainer dans les rues de la Mecque lor du sable chaud. A ene moment ene l'ennemi finne jette tripes ene chameau lor le Saint Prophète<sup>saw</sup> pendant ki li ti dans sijdah. Comme ça même ena bannes les autres hommes et femmes musulmans finne gagne batter et fine bizin subir tout bannes kalités de persécutions par zotte bannes ennemis : bannes idolâtres de la Mecque. Ca situation là finne continuer mais doucement doucement le Jamaat du Saint Prophète<sup>saw</sup> finne continuer grandi. Mais bannes idolâtres pas finne baisse les bras et zotte finne continuer faire zotte bannes méchanceté ziska zotte finne bloque bannes musulmans dans verger de Abu Taleb, chacha du Saint Prophète<sup>saw</sup>. Couma ça finne arriver et ki bannes dimounes ki ti acteurs dans ça drame là, c'est ça l'aspect de l'histoire là ki mo pou raconte zotte dans ça livret là.

## **FIN DE L'ANNEE 616 CE**

Pendant environ six ans après ki li finne commence prêcher, le prophète et so bannes compagnons surtout bannes membres de so tribu Banu Hashim et Banu Mutallib trouve zotte en grande difficulté. Bannes polythéistes de la Mecque finne faire tout pou arrête la marche de l'islam, mais zotte pas finne réussi. A ene moment zotte finne même dire ki zotte pou faire le Prophète Mohammad<sup>saw</sup> vinne zotte le roi et zotte pou donne li plis jolie madame ki ena dans l'Arabie mais li bizin arrête faire so mission. Le prophète finne reponne zotte ki même si zotte mette la lune dans so la main droite et soleil dans so la main gauche li pas pou arrête so mission ki Allah finne donne li. Alors bannes polythéistes

finne décider entre zotte ki le prophète so chacha, Abu Taleb pé donne li so support et donc bizin augmente pression lor li parski li pas pé side avec bannes Qoreiches (bannes idolâtres) mais avec so neveu Mohammad<sup>saw</sup>. Alors zotte finne réuni ensemble et zotte finne écrire ene document pou annonce le boycott de Banu Hashim et de Banu Mutallib. Bannes termes de ça boycott là li comme suit :

1. Bannes Qoreiches pas pou marier avec banne Banu Hashim et de Banu Mutallib
2. Pa pou acheter ou vendre nanrien are zotte
3. Pou arrête tout type de bannes transactions avec zotte.

Ene fois ki document là finne prêt bannes chefs finne signer et zotte finne suspendre li dans la Kaaba pour ki tout bannes dimounes capav prend connaissance.

### **REACTION D'ABU TALIB- CHACHA DU PROPHETE<sup>saw</sup>**

Le chacha du prophète ki ti le chef de tribu fine comprend tout de suite ki situation pé vinne bien dangereux dans la Mecque. Zotte ti peur ki zotte bannes adversaires capave brule zotte bannes la caze. Alors zotte prend la décision pou alle habite dans ene vallée ene ti peu en dehors de la Mecque. Et pendant trois ans li et so bannes familles avec le Saint Prophète<sup>saw</sup> zotte pou reste la bas dans ene situation très difficile. Bannes Qoreiches pou empêche zotte gagne manger et pou empêche bannes dimounes joinne zotte. Mais Abu Talib, papa de Hazrat Ali pou reste ferme avec so neveu même si li pas pou accepter li. Le soir li change place du prophète avec so bannes garçons pour ki si jamais ene kikene vinne rode touille le prophète li pas pou réussi parceki li pas dormi dans même place toute la nuit. Li finne accepter danger et privation pou protège so neveu. Li ti récite bannes poèmes en éloge de so neveu, Mohammad<sup>saw</sup> et nous trouver couma li ti mette so bannes propres garçons en danger pour ki le prophète Mohammad<sup>saw</sup> capav vivre.

### **COUMA LA VIE TI PE DEROULER PENDANT LE BOYCOTT**

Etant donné ki toute la Mecque ti pé applique boycott alors bannes familles d'Abu Talib et le Saint Prophète<sup>saw</sup> ti trouve zotte dans

ene misère noir. Zotte pas ti ena mais et zotte bannes les autres nourritures et pas ti gagne droit acheter, alors zotte finne trouve zotte dans grand difficulté. Parfois bannes madames ti pé prend feuille et bouille ça pou calmer la faim de bannes enfants. Ti ena certains bannes dimounes ki pas ti musulman mais zotte ti essaye aider. Ainsi le neveu de Hazrat Khadija, Hakim ti mette so la vie en danger pou apporte provision pou la famille du Prophète<sup>saw</sup>. Pendant ça l'époque là kikchose plis important c'était de l'eau. Et c'est grâce à bannes pièces d'or ki Hazrat Khadija<sup>ra</sup> ti donne Hazrat Ali bannes familles du prophète finne capav gagne de l'eau pou vivre. A ça l'époque là Hazrat Ali ti ena seulement 16 ans et parfois ti difficile pou gagne de l'eau ki li ti bizin. Et donc situation ti bien difficile pou zotte tous.

### **BANNES CAMARADES NON-MUSLULMANS FINNE ESSAYE AIDER**

Certains de bannes mecquois non-musulmans pas ti d'accord avec ce qui Abu Jahl et so bannes dimounes ti pé faire. Alors de temps en temps zotte ti pé essayer pou amène un peu de bannes provisions pou bannes ki ti pé souffert boycott. Ene de ça bannes dimounes là ti appelle Hisham ibn Amr al-Aamiri. Ene fois li finne amène ene chameau chargé de bannes nourriture pou banne ki ti pé subir boycott. Malheureusement bannes Mecquois finne trouve li et zotte finne attrape li et zotte finne menace pou touye li si li continuer donne bannes là bannes provisions.

Ene l'autre dimoune ti appelle Abul Bukhtari ti ene camarade de Hakim et li aussi li ti pé apporte bannes provisions en cachiette, Ene jour Hakim et li finne tappe avec Abu Jahl et li finne dire zotte ki li pou confisquer zotte bannes marchandises. Alors Abul Bukhtari finne essaye négociier avec Abu Jahl mais li pas finne tombe d'accord et zotte finne la guerre. Raconté ki bannes sympathisants du prophète et bannes partisans d'Abu Jahl ti habituer la guerre dans l'entrée de la vallée de Abu Talib. Mais ceki nou bizin comprend bien ceki ça bannes sympathisants de bannes Musulmans là pas ti encore vinne musulmans à ça moment là. Mais zotte ti bannes dimounes ki ti ena grand sympathie dans zotte le cœur et zotte pas ti content ki empêche les autres dimounes couma zotte souffert a cause zotte bannes croyances. Azordi jour

nous ena ene group de bannes musulmans ki dire ki zotte meilleur ki bannes les autres musulmans mais zotte comportement pire ki bannes boycotteurs du Saint Prophète Mohammad<sup>saw</sup>.

### **QOREICHES VERSUS BANU HASHIM ET MOTALLIB**

Ene l'autre kikchose ki nous bizin rappelle bien c'est ki pas tous bannes musulmans ti dans vallée de Abu Talib. Seulement bannes familles de Banu Hashim et Banu Mutallib ki ti la bas. Bannes Qoreiches conne très bien ki si zotte pas finne réussi détruire le Saint Prophète<sup>saw</sup> c'est à cause de l'aide ki so clan finne apporte li. Alors pour venger zotte finne boycotté bannes là. Mais zotte pas ti boycotté tous bannes musulmans parski ti ena plusieurs bannes musulmans ki ti pé vivre dans la Mecque et li paraitre ki zotte pas ti capav faire grand-chose pou zotte bannes camarades ki ti pé subir boycott.

### **COUMA BOYCOTT FINNE ENLEVER**

Alors pou faire enlève ça boycott là après trois ans ce n'est pas par bannes efforts de bannes musulmans ki ça finne arriver mais plutôt par efforts de bannes sympathisants non-musulmans. Ti ena ene dimoune ki ti appelle Hisham Bin Amr ki ti joué ene grand rôle pour faire casse ça boycott là. Rapporté ki plusieurs fois li finne amène ene chameau rempli avec bannes provisions dans l'entrée de la vallée et ensuite li finne largue li pou li rentre dans la vallée. Et dans ça façon là li finne aide bannes ki ti pé subir boycott beaucoup de fois. Mais so le cœur ti noble. Li pas ti insensible a souffrance de bannes ki ti sous boycott. Alors Hisham bin Amr finne alle cote Zuhayr B. Abu Umayya B. Al-Mughira et li finne dire li :

- "Eski to capave accepter ki toi to manger et to habille toi et to conner condition dans laquelle to bannes mamous pé vivre ? Zotte ne plis gagne droit acheter ou vender ni même gagne droit marier are zotte ? Par Dieu si c'était bannes mamous de Abu Jahl et to ti demande li faire ceki li finne demande toi pou faire, jamais li ti pou d'accord pou faire ça."

Zuhayr fine dire li " Be ki to ouler mo faire. Moi mo ene seul homme. Par Dieu si mo ti gagne ene l'autre dimoune pou soutenir moi, mo ti pou faire annule ça boycott là."

Alors Hisham finne dire li " Mo finne trouve ene homme – moi-même"

Alors Zuhayr finne dire li "Trouve ene l'autre encore !"

Alors Hisham finne alle guette Al-Mutim B. Adiy et li finne dire li, "Eski to d'accord ki les deux clans de Banu Abd Manaf morts tandis ki toi to continuer suivre ceki bannes Qoreiches pé dire? Bientôt to pou trouver zotte pou faire pareil are toi."

Alors Mutim finne faire li même réponse ki Zuhayr et li finne dimanne ene quatrième homme.

Alors Hisham finne alle cotte Abu'l Bukhtari B. Hisham ki finne dimanne ene cinquième homme. Apres ça li finne alle cotte Zama'a B. Al-Aswad B. Al-Muttalib, ki finne dimanne ene sixième homme et li finne rappelle zotte bannes liens familiales et zotte bannes devoirs. Li finne demander si ena bannes les autres ki pou aider dans ça travaille là. Alors finne donne li bannes noms des bannes les autres. Zotte tous finne tombe d'accord pou joinne dans ene l'endroit dans la nuit et zotte finne prend l'engagement pou soulève la question du document ziska ki zotte faire annule li.

## **RENCONTRE DAN LA KAABA**

Le jour suivant quand bannes dimounes finne rassembler Zuhayr fine mette ene vêtement ki zotte habituer mettre pou banne l'occasion pareil et lire faire sept le tour de la Kaaba ; ler la li vinne de l'avant et li dire " O bannes habitants de la Mecque eski nous pou continuer manger boire et habille nous même tandis ki bannes Banu Hashim pé mort sans manger et sans vêtement ? Par Dieu mo pas pou reste tranquille aussi longtemps ki pas déchire ça mauvais document de boycott là !

Abu Jahl crier et li dire : 'To pé cause menti. Personne pas pou détruire ça document là.'

Zama'a dire: " Toi to ene plis grand menteur ; Jamais nous ti approuve ça document là même quand ti écrire li et signe li."

Abu'l Bukhtari dire, 'Zama'a ena raison. Jamais nous ti d'accord avec ça document là quand ti écrire li et nous pas d'accord are li azordi aussi.'

Al-Mutim ajouter et li dire : " Zotte tous les deux ena raison et n'importe ki sanne là ki dire le contraire ene menteur. Nous prend Allah comme témoin ki nous dissocié nous de ça l'idée de boycott là et de ceki finne écrire dans ca document là." Hisham aussi finne cause dans le même sens et li finne soutenir so bannes camarades.

Alors al-Mutim finne prend document et finne déchire li et finne trouver ki bannes insectes ti fini commence mange document là. Ene divent finne vini et tous bannes morceaux de ça document là finne envoler dans l'air et li finne disparaître complètement.

Action d'Al Mutim b. Adiy ti dimanne conviction ek courage. Li et so bannes camarades ti convaincus ki le boycotté social de Banu Hashim pas ti juste et ki en tant qu'Arabe zotte pas ti ena auquene droit pou agir couma bannes Qoreiches finne agir. Alors Mutim et so bannes jeunes guerriers finne mette zotte vêtement pou la guerre et zotte finne alle dans vallée de Abu Taleb et zotte finne escorte Le Saint prophète Mohammad<sup>saw</sup> et tous bannes membres de zotte tribus et zotte finne retourne dans zotte la caze dans la Mecque.

## **COMMENTAIRES LOR ÇA EVENEMENT LA**

Bannes historiens commente ça événement de diverses façons mais nou pas bizin rentre dans les détails. Mais ceki nou bizin noter c'est ki ça cinq ou six nobles arabes ki finne prend l'initiative pou casse boycott social contre le groupe du Saint Prophète<sup>saw</sup> de l'Islam zotte pas ti bannes musulmans. Mais zotte ti bannes dimounes animés par bannes valeurs arabes ki ti trouver ki pa capav condamne bannes dimounes pou zotte convictions. Alors au

péril de zotte propre la vie zotte finne faire les démarches et zotte finne arrête ene dominère contre bannes innocents ki ti croire dans ene Allah Unique. Azordi même plis ki 14 siècles après ça bannes événements là bannes dimounes ki lire ça bannes pages de l'histoire là zotte émerveiller par ça bannes arabes nobles et ki zotte le cœur ti grand et finne fer casse ça boycotte infâme là. Parmi bannes là ti ena dimounes ki pas ti encore vinne musulman mais zotte comportement ti plis noble et plis courageux et plis juste ki beaucoup de bannes musulmans zordi jour. Malgré la force et l'influence de Abu Jahl de faille réputation zotte finne oser pou fer face are li et zotte finne défier li et zotte finne fer casse ene boycott social ki ti pé pratiquer contre ene ti groupe dimounes. Quel ironie de l'histoire: azordi musulman ki finne accepter le Saint Prophète<sup>saw</sup> et ensuite le Messie Promis<sup>as</sup> finne préfère adopter sunnat de Abu Jahl et so bannes camarades de faille réputation au lieu du noble sunnat de nou bienaimé prophète<sup>saw</sup> et so bannes compagnons !

### **BOYCOTT CONTRE JAMAAT AHMADIYYA AL MOUSLEMEEN**

Aster nou pou cause lor boycott social ki nous bannes membres pé subir depi dix ans. Tout louange pou Allah ki ziska l'heure li pas finne donne auquene gouvernement dans la main de bannes Ahmadis. Parski avec l'esprit fermé et mesquin ki zotte ena zotte ti pou toujours envi suivre Abu Jahl et so bannes façons de faire au lieu des la façon de faire du Saint Prophète Mohammad<sup>saw</sup>. Dans l'histoire nou finne appranne ki c'est le prophète et so bannes dimounes ki subir boycott sociale. Ça li ti comme ça dans le passée et li comme ça azordi et li pou comme ça demain aussi. Bannes Ahmadis finne préfère suivre simin travers au lieu ki zotte suivre simin droite pou lequell zotte prier tous les jours !

Quand en l'an 2001 finne annoncer avec grand fanfare ki finne mette nous en dehors du Jamaat, l'amîr finne recevoir bannes félicitations de la part de bannes "notables" du Jamaat. Apres so sermon de Jummah du 5 Janvier ene derrière l'autre zotte finne alle félicite li pou ça grand travail ki li finne faire pou préserver l'Ahmadiyyat. Selon zotte, l'amir finne montrer li à la hauteur et li finne réussi matte ene rébellion au sein du Jamaat dirigé par moi.

A ça moment la finne ena bannes dimounes ki proches avec moi et ki finne dire moi ki puisque finne mette moi en dehors du Jamaat alors mo bizin présente mo excuse et rentre dans Jamaat de nouveau. Mais pour moi li pas ti question du tout pou présente auquene excuse ni au calife et surtout en moins à so amir local. Mo finne dire ça bannes dimounes ki ti téléphone moi là ki mo pas pou présente auquene excuse. Si mo ti présente excuse li ti pou paraitre ki ceki nous ti pé dire li fausse. Mais mo ti convaincu ki ti ena ene manifestation d'Allah et ki mo pas gagne droit faire comme si pena nanrien parski pression pé vinne lor moi. Mo ti disposer arrive qu'arrive pou reste lor simin ki Allah finne mette moi. Plus tard mo finne comprend ki ena dimoune ti dimanne excuse. Mais pas moi. De toute façon ça c'est ene l'autre histoire.

### **MACHINE REPRESSIVE AHMADIYYA**

Quand amir et so bannes finne trouver ki nous pas pou céder alors zotte essaye force nous pou céder. A l'époque nous ti ena l'intention alle lire namaz Eidul Adha dans Masjid New Grove. Alors l'amir, tout ignorant ki li été de bannes enseignements islamiques, li faire ferme Masjid le jour de Eid pou empêche nou alle lire Namaz la bas. Alors dans so ennemité contre bannes Ahmadis ene amir Ahmadis pour la première fois dans l'histoire faire ferme ene mosquée le jour d'Eid par pure méchanceté.

Petit à petit certains les autres membres du Jamaat finne vinne joinne nous. La plupart de ça bannes dimounes là ti bannes dimounes ki proches avec moi et mo frère Siddique. Eventuellement nous finne organise nous en ene Jamaat et nous finne continuer évoluer comme ene Jamaat depuis. Au début tout bannes dimounes ki ti pé joinne nous ti pé annonce zotte expulsion du Jamaat tout les Vendredis. Mais quand amir et so bannes finne trouver ki zotte pas capav continuer comme ça zotte finne change tactique et zotte arrête mette bannes ki joinne nous en dehors du Jamaat. C'est comme ca ki ena dimounes ki avec nous mais jamais finne annoncer ki finne mette zotte en dehors du Jamaat.

Alors a partir de 2004 zotte utilise ene lettre de Chaudri Hamidullah, le Wakil ala pou applique ceki zotte appelle boycott

sociale contre nous bannes membres. La lettre en question so traduction li comme suit :

"Mo faire référence à mo lettre circulaire en date de 21 Février 2004 cotte mo ti donne zotte l'instruction suivant de Hazrat Khalifatul Masih V :

Ene deux membres du Jamaat invite bannes ki fine pénaliser par le Jamaat dans zotte bannes fonctions sociales et autres. Jamais bizin faire ça. Cause avec ça bannes dimounes là c'est ene zaffaire mais cultive des relations sociales avec zotte c'est tout à fait autre chose. Faut pas boycotte ça bannes dimounes là complètement, mais li important pou faire zotte conner ki nous pas content avec zotte, sinon jamais zotte pou realise zotte erreur. Non seulement ki pas bizin accepter zotte chanda et bannes les autres contributions, mais pas bizin invite zotte dans ou bannes fonctions sociales pourki zotte capav gagne regret pou ceki zotte fine faire et zotte dimanne pardon (*istighfaar*.)

Bannes membres comité du Jamaat et bannes les autres organisations auxiliaires bizin sorti tout de suite de bannes mariages cote pé pratique bannes rites et rituels ki contraire à l'esprit de l'Islam et de l'Ahmadiyyat."(Réf T 10674/26.05.04)

Alors depi ça l'époque là dans l'île Maurice, groupe majoritaire Ahmadiyya finne amène ene campagne systématique de boycott contre bannes membres du Jamaat Ahmadiyya Al Mouslemeen. Et ça travaille là finne faire sous l'instruction directe du calife actuel, Mirza Masroor Ahmad. So amir et bannes membres du Majlis Amla et la majorité de bannes membres Ahmadis de l'Ile Maurice finne essaye applique ça instruction de zotte calife là plis ki tous bannes les autres instructions ki Allah ou so prophète finne donner. Dans Maurice pas finne écrire auquene document pou explique bannes détails de boycott contrairement à bannes kafir de la Mecque dans l'époque du Saint Prophète <sup>saw</sup>. Mais étant donné ki la plupart de bannes Ahmadis pas finne suivre les instructions de Hazrat Masih Maood <sup>as</sup> pou purifier zotte de zotte nature malpropre alors l'amir et le groupe dirigeant pas finne bizin faire grands

efforts pou exploite la haine de la majorité de bannes Ahmadis contre bannes membres du Jamaat Ahmadiyya Al Mouslemeen.

Fort heureusement dans l'île Maurice bannes Ahmadis pas exerce pouvoir sinon zotte pas ti pou hésiter pou faire ceki bannes kuffars de Mecca ti faire contre le groupe du Saint Prophète<sup>saw</sup>. Tout louange pou Allah ki zotte pas contrôle auquene partie de l'économie sinon zotte pas ti pou hésiter pou empêche nous gagne nous nourriture aussi. Mais a part ça zotte finne faire zotte ene devoir pou rivalise avec bannes kuffars de la Mecque dans l'époque du Prophète<sup>saw</sup> pou faire nous sentir zotte la haine et zotte mépris. Et ladan zotte finne bien réussi. Zotte succès dans ça domaine là li dépasse zotte succès dans tous bannes les autres domaines. Zotte finne montrer couma zotte capav fer du tort à zotte bannes proches sans soucier comment zotte pou ranne compte à Allah!

Le Jamaat Ahmadiyya finne créer pour fer manifester ceki ena de plus nobles dans l'âme humain. Mais bannes dirigeants actuels finne réussi par zotte méchanceté naturel pour éveil ceki ena de pire dans l'âme humain quand finne force bannes ti dimounes suive ene enseignement rétrograde et dégradante ki de loin aussi pena nanrien a faire avec l'Islam.

## **PRATIQUES NON ISLAMIQUES DE BANNES AHMADIS**

Alors ene sel coup bannes Ahmadis arrête faire salaam. Parfois comme réponse de nous salaam zotte reponne "korek ça" ou bien zotte reponne "alaikoum". Ene l'autre idiot au lieu li donne so la main li donne avec so coude. Ene l'autre ki soi-disant conne l'Islam li refuse donne la main carrément. Ena bouche zotte oreilles comme ci zotte finne tanne ene juron !

Zotte faire tous pour ki nous bannes proches par exemple nous sœur, cousin et mamou pas invite nous dans bannes mariage de zotte bannes enfants. Pou réussir dans ça l'objectif là l'amir du Jamaat Ahmadiyya ki là pou reforme le monde finne ena recours à l'intimidation, la menace et le chantage. Et li finne bien réussi à faire bannes Ahmadis pratique ceki bannes idolâtres de la Mecque tipé pratiquer. Parfois si ene dimoune finne donne ene invitation

l'amîr finne force ça dimoune là pou alle reprend so invitation là pareil couma bannes li chiens ré-avale zotte vomî. Zotte finne empêche voisin vivre couma le prophète finne dire bizin vivre et le Jamaat finne mette la haine entre bannes frères et sœurs pou créer division entre zotte. Dans so façon de faire le Jamaat Ahmadiyya sous l'amîr actuel avec tout bannes ki soutenir li finne éparpille la haine dans la société mauricienne au lieu de répandre l'amour selon le slogan ki zotte finne adopter "l'amour pour tous la haine pour personne". Zotte finne aussi essaye mette désordre entre mari et femme aussi. Mais Allah pas finne permette zotte faire. Et zotte finne tombe dans trou zotte ti pé fouiller pou zotte camarades ! Certains finne déjà gagne punition pou ceki zotte ti pé rode faire et les autres pou gagner bientôt si Allah ouler.

A plusieurs reprise Allah ti finne dire moi : " *Fa makarou famaka rallah wallaho khayroul maakereen*". Traduction c'est ki " Zotte faire plan et Allah faire plan et Allah Li meilleur de bannes ki faire plan !" Et Allah ti finne aussi dire moi à plusieurs reprises " *Inni mohinoun man araada ihanataka*". Traduction c'est "définitivement Mo pou humilier celui ki essaye humilier toi". Aster si ou ena ene tigitte taqwa guette ene coup le sort de ça bannes dimounes ki finne essaye jouer ene rôle de premier plan soi par zotte conseils, zotte bannes écrits ou zotte bannes discours pou essaye contrecarrer moi et bannes ki avec moi et guetter couma Allah finne gentille envers zotte ! Prend conte O bannes dimounes ki trouve clair!

## **RESULTAT DE CAMPAGNE DE BOYCOTT DANS MAURICE**

Heureusement dans Maurice l'influence de bannes paroles du calife Ahmadiyya li arrête seulement avec so bannes fideles. Et zotte capacité pou faire du mal finne reste très limité a cause de bannes la loi du gouvernement Mauricien. Mais la saleté ki ti enfoui dans plusieurs les cœurs de bannes Ahmadis finne remonte à la surface et bannes Ahmadis finne montrer couma malgré l'enseignement de Hazrat Masih Maood <sup>as</sup> zotte pas finne réussi faire presque auquene progrès pou purifier zotte propre l'âme. Alors couma bannes chiens enragés aveugles zotte finne rode faire du tort à zotte bannes propres frères et sœurs. Pou plaire à zotte

calife zotte finne faire beaucoup du tort sans ki zotte soucier zotte de bannes conséquences de zotte banne actions. Zotte pas finne guette divan et derrière, couma finne dire zotte faire boycott zotte finne reponne présent. Et zotte finne oublier ki ena ene Allah a ki ene jour zotte bizin ranne conte de zotte bannes actions. Le résultat c'est ki ene Jamaat ki ti finne créer pou répande la paix et la justice dans le monde finne montrer li comme ene groupe des plus mesquins, de plus méchants et de plus arriérés en pensée dans la société mauricienne. Azordi cotte tous bannes les autres groupe éclairés pé cause de l'inclusion, association Ahmadiyya de l'Ile Maurice finne tappe so l'estomac pou dire ki li pou pratique l'exclusion. Cotte les autres pé cause de l'amour, bannes Ahmadis préfère la haine. Et c'est ça groupe de bannes intégristes là ki dire ou ki zotte pou conquérir le monde et zotte pou établir la justice! Et le moyen ki pou permette zotte faire ça c'est ene slogan seulement "Love for All Hatred for None" ! Voila le niveau le plus bas cotte bannes membres de ça Jamaat finne tomber ces jours ci. Ki Allah protégé nous de l'ascension d'ene tel groupe !

### **BE SI NOUS HAZUR FINNE DIRE.....**

Dans le Jamaat ena certains bannes dimounes ki pas d'accord avec boycott de zotte bannes familles et zotte pas pratique li. Et la direction du Jamaat peur ki bannes dimounes commence défier zotte. Alors la direction du Jamaat fer faire bannes discours pou lave cerveaux de bannes Ahmadis et pou justifier ça boycott sauvage là. Ainsi ou capav tanne dire ki bannes missionnaires ki finne sorti de Jamia Ahmadiyya rode faire banne dimounes croire ki boycott permette dans l'Islam. Mo dire ca bannes missionnaires là si vrai même zotte certificat vaut quelque chose produire ene document pou prouve ceki zotte pé dire. Zotte la main pou trembler avant zotte écrire quoique ce soit parski zotte conner ki pena auquene document ou verset Coran pou présenter. D'ailleurs mo finne appranne ki ena ene missionnaire sorti depi dans Jamia ki pé déclarer li finne pose moi bannes questions et mo pas finne capav reponne. Voila mo donne li ene l'occasion pou faire bannes dimounes conner ki questions li ti pose moi et quand li ti pose moi ça. Le moment finne arriver cotte zotte vrais visages sans voile (*niqab*) pou présenter au public.

Alors bannes ténors du Jamaat ki ziska récemment pas ti pé vinne de l'avant pou causer finne refaire surface. Ene parmi zotte finne déclarer récemment dans ijtema Ansarullah ki "définitivement pas gagne droit casse bannes relations familiale parski dans l'Islam c'est ene kikchose sacrée, mais si nous Hazur pé dire nous faire ça alors peut être capave ena ene sagesse ladan....." Mo pas ti présent là bas mais mo finne gagne ça information là depi ene dimoune ki capave faire confiance. De toute façon dans Jamaat Ahmadiyya Maurice et ailleurs bannes bons Ahmadiyya comprend ki zotte calife pas capav faire erreur quand même calife dire ki li capav faire erreur! C'est ça statut contraire aux enseignements de l'Islam ki zotte fine donne zotte chef/calife. Alors cherche sagesse dans bannes l'ordre anti-coran ki calife donné pas étonne du tout bannes dirigeants du Jamaat. Pou zotte obéissance veut dire obéissance dans tout. Par zotte ignorance zotte alle même ziska oublier zotte serment de bai'at cotte zotte déclarer ki zotte pou obeir ceki *ma'roof*.(ceki bon et raisonnable ; ceki d'après le Saint Coran). Mais de toute façon ça l'idée là li bien répandu dans le Jamaat ki bizin obeir calife dans toutes les circonstances. Et pourtant ça c'est ene fausse l'idée ki fine répande ziste pou empêche ki ena objections lor bannes décisions du calife. D'après l'Islam bizin obeir l'ordre calife aussi longtemps ki li en conformité avec ceki Allah finne dire dans le Saint Coran.

### **ESKI CALIFE CAPAV CONNE PLIS KI ALLAH?**

Aster si nou poursuivre ça l'idée là ça veut dire ki le calife li conne plis ki Allah (*na'ouzo billa*) parski li faire quelque chose ki Allah dire pas faire et bannes dimoune rode faire les autres croire ki ena sagesse dan ceki li faire. Bannes cozé pareil faire ziste pou contrôle l'esprit ti dimoune ki gagne zotte connaissance de l'Islam seulement dans bannes discours ki faire dans mosquées. Ailleurs nou finne déjà trouvé ki kalité dégâts banne discours pareil finne faire. Et aster bannes mollahs Ahmadiyya finne introduire ça dans nous bannes mosquées. Et ki faire zotte cause ça kalité discours là ? Parski zotte finne comprend ki zotte bizin reste toujours attachés avec la corde de khilafat arrive qu'arrive. Alors zotte utilise zotte capacité pou causer et pou persuader pou donne

bannes dimoune zotte vision étriquée de la religion de l'islam et de l'Ahmadiyyat. Zotte pas conner et zotte repanne zotte ignorance.

## **ENSEIGNEMENT ISLAM LOR ÇA SUJET LA**

Aster laisse nous guette ceki Allah et so Rasool fine dire lor ça sujet là. Dans le Saint Coran Allah dire :

"Parmi bannes dimoune ena ki prend pou adoration les autres kikchose à part Allah et zotte content ça bannes affaires là couma zotte ti bizin content Allah. Mais banne croyants zotte l'amour pou Allah li plis fort. Et si bannes méchants (*zalims*) ti trouve le moment quand punition pou vini zotte ti pou conner ki tout pouvoir dans la main d'Allah et Allah très sévère dans punition"(SC 2 :166)

D'après ça verset là li claire. Ene croyant bizin ena plis l'amour pou Allah et pas pou personne d'autre. Et quand nou content Allah nous adore Li et nous obeir Li seulement. So obéissance là haut obéissance de tout le monde. Pas capav ena ene calife ki dire Allah finne mette li là et ki gagne droit fer kikchose contre ceki Allah dire. Ene tel calife pas mérite place ki li pé dire li ena. Si bannes idolâtres de La Mecque ti ena *hobal* comme idole la plupart de bannes membres du Jamaat avec zotte soi disant obéissance au khilafat finne prend ça institution là comme idole et zotte obeir et adore li.

Aster bannes dimoune ki pou lire ceki mo finne écrire pou pique ene colère et zotte pou dire ki ça pas vrai. Zotte bannes ki prier Allah exclusivement. Dans Hadith de Tirmizi raconter ki ene fois le Saint Prophète Mohammad <sup>saw</sup> finne récite verset suivant:" Banne la (Juifs et Chrétiens) finne prend comme Bondié a part Allah zotte bannes rabbins et zotte bannes moines et aussi le Messie, fils de Marie, tandis ki ti dire zotte prier ene sel Dieu. Personne pena pou être adorer a part Allah Ki Li glorifié plis ki tous bannes partenaires ki zotte associés avec Li."(SC 9 :31).

Alors ene certain Adi bin Hatim fine dire " mais bannes la (Juifs et Chrétiens) zotte pas adore zotte banne rabbins et moines."Alors le Prophète <sup>saw</sup> fine dire "Définitivement zotte fer ça. Zotte banne rabbin et zotte bannes moines ti fer banne kikchose illégale vine légale et bannes kikchose légale vine illégale et bannes la ti suive

zotte et quand zotte ti fer ça zotte ti pé adore zotte."(Tirmizi et Jarir)

Dans le passé eski nou pas ti pé dire banne les autres musulmans ki zotte laisse zotte bannes savants décide pou zotte. Et azordi ki nou pé faire ? Bannes Ahmadis finne vine pareil couma bannes dimounes avant et zotte ignore Allah et zotte écoute zotte bannes savants et calife !

### **"GAGNE PEUR SEULEMNT DE MOI O BANNES DIMOUNES INTELLIGENTS"**(Saint Coran)

Allah dire nous ki nous bizin peur seulement Li et pa personne d'autre même si li ene calife ou ene amir ou bien ene membre du Amla ou bien président ou premier ministre ene pays. Allah finne enseigne le musulman de tous temps ki dans tous bannes circonstances de la vie zotte bizin cultive seulement la crainte d'Allah dans zotte le cœur. Plis crainte Allah pou augmenter dan ou le cœur plis ou pas pou peur personne a part Li. Ou pou vinne ene dimoune courageux, Allah pou mette la lumière dan ou le cœur et ou pou capave malgré ou connaissance limité discute avec bannes savants parski c'est Allah ki pou enseigne ou. Ou penser ki Jamaat Ahmadiyya pou content ki ou vinne ene tel dimoune ? La direction du Jamaat pou envie continuer mainmise ki ena lor ou et maintenir ou dans ene l'état d'esclavage mental. Mais Hazrat Masih Maood <sup>as</sup> finne vini pou enseigne nous pou augmente nous crainte d'Allah pour ki nous libère nous de tous bannes les autres frayeurs. Mais le Jamaat Ahmadiyya finne écarte li de ça noble enseignement là. Li finne remplace li par ene kikchose ki appelle nizaamé Jamaat et khilafat. Azordi pé essaye fer dimoune croire ki si zotte pas attaché avec le khilafat zotte dans difficulté et zotte pas pou gagne le salut (*najaat*). Et pareil couma bannes les autres musulmans croire aveuglement ki Hazrat Isa lor le ciel de la même façon finne faire bannes Ahmadis croire ki le system de khilafat li ene system approuvé par Allah et ki li pou dure ziska bannes derniers jours. Mais azordi mo capav dire ou ki le Jamaat finne embête nous lor ça zaffaire là. Ça khilafat ki finne donne nou c'est pas khilafat ki Hazrat Masih Maood <sup>as</sup> finne enseigne nous. Ceci li finne enseigne nous c'est ene khilafat ki beaucoup plis vaste plis

noble ki ceki le Jamaat finne montrer nous ziska l'heure. A plusieurs reprises mo fine expliquer ki type de khilafat ki Hazrat Masih Maood<sup>as</sup> fine lègue nous. Li finne fer nous comprend ki Allah pou continuer élève bannes dimounes pieux dans so Jamaat pou fer reforme de so Jamaat parski li ti conne très bien ki ene Jamaat gâter après ene certaine l'époque. Li finne dire nous ki tous bizin travaille ensemble ziska ki Allah élève ene dimoune avec l'esprit saint (*rouhoul qoudous*) Mais la direction du Jamaat fine impose le système de khilafat ki nou conner azordi. Mo pou cause plis lor la dans mo prochain livret incha Allah.

### **KI HAZRAT MASIH MAOOD<sup>AS</sup> FINNE ENSEIGNE NOUS**

Hazrat Masih Maood<sup>as</sup> ti ene quelqu'un ki ti gagne connaissance d'Allah intuitivement et par révélation. Li fine explique nous ki nous bizin fer pou ki nous aussi nous capav gagne ça type de connaissance la. Pou fer ça nou bizin ena bannes dimounes parmi nous ki pé fer bannes efforts nécessaire pou alle dans ça direction là. Récemment mo fine appranne ki bannes membres de Lajna fine fer ene l'examen lor livre "l'Arche de Noé". Mo sure finne ena beaucoup bannes madames ki finne lire le livre pou alle passe l'examen. Mais combien parmi bannes madames et bannes missiés fine fer zotte ene devoir pou lire livre là et mette en pratique bannes enseignements ki Hazrat Masih Maood<sup>as</sup> finne donne nous la dan ? Peut être nous capav compte zotte lor nous bannes les doigts. Avec fanatisme ki majorité Ahmadis (hommes et femmes) finne montrer dans zotte zèle pou applique boycott de zotte bannes frères et sœurs nou bizin comprend ki zotte pas finne comprend nanrien dans bannes enseignements ki Hazrat Masih Maood<sup>as</sup> finne donne nous même si zotte finne vivre 80 ans ou plus ! Eski ou pas peur ki bientôt ou pou joinne ou Seigneur et ki ou pou reponne pou tous ça bannes péchés ki ou finne fer contre ou bannes proches ? Eski c'est ça ki finne enseigne ou ? Si c'est ça ki ou finne appranne, ca veut dire ou fine fel parski Hazrat Masih Maood<sup>as</sup> ti vini pou fer ou vinne ene vrai musulman, mais ou finne préfère reste ene musulman de nom ! Rappelle bien ki li fine dire nous dans so livre "Arche de Noé" :

"A vrai dire n'importe ki sanne la capav dire ki li content Bondié. Mais c'est seulement ça dimoune ki le ciel

témoigne de so l'amour ki vraiment content Bondié. Chacun dire ki li ene suivant de la vrai religion, mais seulement la religion de ça dimoune ki gagne la lumière dans ça le monde la ki vrai religion. Et tout dimoune dire ki li pou gagne le salut, mais seulement ça dimoune à ki fine donne ene la lumière la ki capav fer ça déclaration la..."

Alors si la direction du Jamaat actuel ena kik lumière mo dimanne zotte pou éclairer moi ar ça. Mais couma zotte capav dire ki zotte ena ene lumière quand zotte pé fanne marée noire partout. Ene l'autre place li dire nous :

"Pas gagne peur de malédiction ki le monde capav envoyer lor zotte parski ça li faner dans l'air couma la fumée et li pas capav fer lizour vinne la nuit. Mais zotte bizin gagne per de malédiction Bondié ki déracine tout dan les deux mondes pou bannes dimounes lor ki li tomber. Ou pas capav sauve ou avec l'hypocrisie et fer semblant parski Allah trouve le plus profond de ou l'âme. Couma ou capav décevoir Li... ?"(Arche de Noé page 3)

Ene l'autre place dans le même livre li dire nous

"Dans le ciel zotte pou considérer comme bannes membres de mo Jamaat quand zotte tout ensemble, en réalité zotte pou commence marche lor simin de la piété"(p7).

Aster essaye pose ou ene question : ki quantité ou finne marche lor le chemin de la piété quand ou finne applique ça boycott anti-islamique ordonner par ou calife et appliquer par ou amir et so bannes béni-oui-oui. Hazrat Masih Maood<sup>as</sup> so bannes enseignements finne condamne ou. Allah finne condamne ou et le Saint Prophète<sup>saw</sup> finne condamne ou bannes actions. Alors comprend bien ki en tant ki ene Ahmadi ki finne rentre dans ene Jamaat pou gagne so salut, azordi ça li pas possible parski ou bannes chefs nepli pé fer ceki ti bizin fer pou aide ou gagne ou salut. Zotte finne détourne bannes enseignements pures et nobles du Messie et zotte finne remplace li par bannes enseignements ki plaire juste zotte bannes instinct bas. Zotte nepli représente l'enseignement ou la pratique de Hazrat Masih Maood<sup>as</sup>. Zotte

représente seulement zotte vrai nature, zotte pas finne ouler purifier zotte. Alors Allah, fidele a promesse ki Li ti finne fer Hazrat Masih Maood <sup>as</sup>, li finne reprend l'affaire en main et li rétablir l'ordre et Li mette ene So dimoune pou continuer fer travail de So Messie.

Ki Allah guide bannes ki envie être purifiés à zotte destination cotte zotte pou gagne zotte l'objectif. Ameen

Ki Allah pardonne li et ena pitié lor li et so bannes suivants,

**Zafrullah Domun**

Imam De Bannes Pieux

Jamaat Ahmadiyya Al Mouslemeen

Les Guibies, Pailles

Ile Maurice

16 Muharram /23 Décembre 2010



Zafrullah Domun li ene Imam ki Allah finne nommer par révélation pou bannes dimounes ki cultivate So Crainte dans zotte le cœur. Actuellement li à la tête de Jamaat Ahmadiyya Al Mouslemeen. Dans le passée li ti finne dirige Jamaat Ahmadiyya de l'Ile Maurice en tant ki amir pendant 10 ans (1988-1998). Li et so bannes camarades zotte finne engage zotte pou maintenir bannes vrais enseignements de Hazrat Mirza Ghulam Ahmad<sup>as</sup> (1835-1908), le Messie Promis et Mahdi, fondateur de Jamaat Ahmadiyya. Zotte pé fer bannes efforts pou fer bannes dimounes conner ki le fondateur du Jamaat Ahmadiyya finne dire et ki pé pratiquer azordi par la direction du Jamaat. Li finne écrire trois ti livrets en créole cotte li finne expliquer so bannes idées. Titre de ça bannes livrets la comme suit :(1) "*O Qutoub uddin guette Mo Jamaat, occupe toi de li*"(2) *Sermons de Zafrullah Domun Volume 1*(3) "*Pena obéissance si dire ou désobéir à Allah, bizin obeir seulement ceki ma'roof.*" Ou capave gagne plisse informations lor zotte mission lor [www.jaam-international.org](http://www.jaam-international.org) . Lor le website ou capav lire ene profil de Imam Zafrullah et aussi tous so bannes sermons de vendredis en Anglais. Ou capav aussi lire bannes les autres articles li finne écrire. Imam Zafrullah déclarer ki li ena l'autorisation de la part d'Allah pou fer so mission et fer bannes dimounes surtout bannes Ahmadis conner cotte la direction du Jamaat finne écarte li de bannes vrais enseignements et finne adopter bannes ki fausses. Pou l'honneur et l'intégrité de Hazrat Mirza Ghulam Ahmad<sup>as</sup> li important ki bizin ramène Jamaat lor so bannes enseignements fondamentales. Si ou intéresser pou contacter li pou partage ou bannes idées ou pou pose bannes questions, ou pou demande bannes clarifications ou capave envoie li ene email à [contact@jaam-international.org](mailto:contact@jaam-international.org).